

■ DONAT

La MiMS a las sias «Istorgias»

(cp) Digl concert anual da la Musica instrumentala Muntogna da Schons (MiMS) vignan igls tocs musicals an-tretschos an istorgias ad anecdotas capitadas agls curs digls ons. Igl dirigent *Walter Stenz* à fatg la schelta da las cumposiziuns a digls aranschamaints sen fundamaint da quels evenimaints.

15 ons anecdotas

Agl curs digls 15 ons c’el magna la MiMS e’gl sarimmo bagn anqual anecdota. Ascheia vean saragurdo digl vieadi a Florenza cun la «Sinfonia Italiana», digl vieadi an la Surselva bernesa cun la canzùn da Mani Matter digl «Sidi Abdel Assar dad El Hama». Turnànd an la valada vignan sunos igls «Sòlts da Schons».

«Tge c’e spezial da que concert», gi *Claudio Castelli*, igl parsura da la MiMS, «en igls divers instrumaints ca vignan sunos. A l’antscheata resùnan las tibas, agl curs digl concert las cornamusas ad igl sùn a buca.»

Alura savundan tocs classics digl repertori digls ons passos cun tetels ancunaschaints sco «Phantom of the Oper» d’Andrew Lloyd Webber near «Igl um cuagl sùna a buca» ord igl film «C’era una volta il West».

La canzùn franzosa «Non, je ne regrette rien» a la spirituala «Steel away» vignan cantadas solisticameing da la cantadura *Claudia Trepp*. Ear ella e part da l’istorgia da la MiMS. Egna culminaziùn digl concert vean ad easser igl toc da rock da Freddie Mercury a la furmaziùn Queen: «Bohemian Rhapsody».

A la fegn e’gl igl toc agl stil da jazz digl cumponist american Glen Miller «In the mood» ca procura par «bùna luna», cumbagn c’igl sarà igl davos concert da la MiMS sut la batgeta da Stenz.

**La prova prinzipala à liac vendergis, igls 8 da favrer ad igl concert anual la sonda digls 9 da favrer, mintgame a las 20.15 an la sala polivalenta da Donat. Suainter dat igl notg libra a musica da sòlt cuagl «Duo Polaris».**

■ MASAGN

Café rumantsch cun Casper Nicca

(cp) Margis, igls 11 da favrer à liac igl proxim Café rumantsch a las 19.30 an l’ustreia Bergmühle a Masagn. Igl schurnalist, fotograf a filmist *Casper Nicca* da Casti raschùna sur da la sia lavur a digl film c’el à actualmeing a màn da far.

El preschainta igls andrezs c’el drova par filmar a mussa co el fotografescha cun la sia camera analoga a co el svilupescha igls films an la tgombra stgira. El dascura ear sur da las fegnamiras c’el persequitescha cun las sias fotografias.

Ulteriuras infurmaziuns sen [liarumantscha.ch](http://liarumantscha.ch)

reclama



Erlebe besondere Familienferien  
Direkt ab Altenrhein

Menorca, Lefkas & Epirus, Kefalonia, Kalabrien sowie – Korsika ab Zürich und Memmingen

1. Kind reist für CHF 110,-  
Gültig in ausgewählten Feriendomizilen und bei Neubuchung vom 01.02. bis 29.02.2020

Buchen: [www.rhomberg-reisen.ch](http://www.rhomberg-reisen.ch)  
Experten beraten: 0800 800 892  
oder in Ihrem Reisebüro  
Rhomberg Reisen GmbH - Eisengasse 12 - A-6850 Dornbirn





Igls victurs digls matatschs S14 cun Pablo Baselgia (2.), Robin Bläsi (1.) a Fabian Sam-paio (3.), tuts tres da Lantsch.



Las victuras da las matatschas S10 cun Larina Zwahlen, Lantsch (2.), Melanie Zala (1.) a Seline Hartmann (3.), Cuira.

# Igl skicross da Spleia

63 unfants e giuvenils sen las loipas da Valragn

■ (smh) Spiert da cumbater, movi-maint an l’aria frestga, quegl à carma-lo 63 unfants a giuvenils ord las stivas tgòldas sen las loipas da Valragn par far part digl skicross a Spleia igls 29 da schaner – egn gi c’igl naveva lea-vameing a la pista an la nev nova pa-reva egn darpùn raso. Igl skicross vean absolvieu an l’usitada tecnica da cursa lùnga, sco igl e tradiziùn a Spleia. La partenza e individuala. Igls ple giuvenis àn da parcurer egn rudi dad 1,4 km, igls ple vigls tres geadas igl tschancùn lùnga dad 1,7 km, peia 5,1 km.

Igl skicross da Spleia e popular par-quegl c’el pretenda betga me bùna cun-diziùn a speartadad, mobagn surtut ear anschegn segls skis stretgs. Igl sto vagnir mido pliras geadas igl viél, fatg striets stretgs, surmunto undas nunspitgeadas, stiernas inclinadas, secziuns da slalom a passo igl renumo «pedalo». Igl pedalo e egna retscha d’undas cuntrarias da dretg a saniester. Quel scolescha la movibladad coordinativa digls atlets. Da la cursa àn fatg part giuvnas passlùnghistas a

giuvenis passlùnghists da Cuira antoca Mesoc, digls clubs da skis nordics digl Grischùn Zentral sco digl Bual da Lantsch, Scardanal Panaduz, da Tregg, digl Rätia da Cuira, da la Scola da pass-lùnga da Cuira a natiralmeing digl Club da skis Tambo Spleia (CTS) ad ear giasts giuvenis.

Igl skicross da Spleia vala par la seria da cursa da la Cupa Cargo Grischa. El vean organiso digl CTS a la Zela da trenamaint nordic Grischùn Zentral, sustanieu da SportGrischùn a digl Turissem Viamala. Las proximas cursas publicas vignan organisadas da cuminànza digl CST, da l’Uniùn da Sport Tumpriv a digl Sci Club San Bernardino. Quegl e igl «Biatlon del Cacciatore» da San Bernardegn da sonda, igls 15 da favrer ad igl «slalom paralel da Spleia» da sonda, igls 7 da marz.

Las anunztgas en da tarmeter a [sctambospluegen.ch/enroll](http://sctambospluegen.ch/enroll). La rangaziùn digl skicross digls 29 da schaner po vagnir scargeada da [sctambospluegen.ch/ranglisten](http://sctambospluegen.ch/ranglisten)



Igls victurs digl matatschs S16 cun Nuno Arioli, Cuira (2.) a Silvio Wieland digl SC Tambo Spleia (1.).

FOTOS CLUB DA SKIS TAMBO SPLEIA

# «Musica agl vitg» puspe a Veulden

Vieadi musical cun igl duo «Oblivion»

■ (gb/bt) Ear san Peader e adigna da la partida cur ca la musica resùna agl vitg. Ad uras par la stagiùn d’unviern à l’raso igl darpùn alv a Veulden, ascheia c’igl ziclus da konzerts «Musica agl vitg» à pudieu vagnir aviert igls 28 da schaner an vastgieu da du-meingias. Igl duo «Oblivion» à mano igl auditori sen egn vieadi musical atras la Finnländia, l’Itaglia, la Svizra ad agl Pajis digl tango. An la valischa da *Lis Frei a Toune de Montmollin* sacatavan igl orgelet svizer, igl acordeon, l’arpa irlandesa, la flauta ad igl tgòld tient da lur tgànt.

«Igl num Oblivion munta amblidànza. Malgro que num vean quella sera da concert a restar nunamblidevla!», tanor igls plets d’angraztgamaint da *Sophia Windel*, l’organisatura da quella retscha da konzerts.

*Beatrix a Bruno Porro*, igls giastaders da leza sera, àn banavanto cordialmeing igl numerus auditori an lur stiva tgòlda, sclarida me da glisch da candelas. L’am-parnevla serada e vagnida concludida cun raschienis animos, gustànd vegn a pàn fatg da la «pastarnareia» an tgea.

La simpatica retscha da konzerts, la quala vean salvada durànt las vacànzas d’unviern, vean purtada antras igls generus dùns da sponsurs a cun las antradas da las colectas. Davent da la fegn da schaner antoca l’antscheata da marz àn liac mintgame igls margis sera sis konzerts an sis diferaintas casadas. Igls de-



Igl duo «Oblivion» à mano igl auditori sen egn vieadi musical atras pliras tearas an la stiva da Beatrix a Bruno Porro da Veulden.

FOTO S. WINDEL

tagls en d’andriescher agl calender d’aranschamaints digl Turissem Viamala sco ear sen las afischas agl vitg.

Igls 4 da favrer à liac la proxima sera da concert: An la Remisa da l’ustreia

Crap Salvatg e d’udir la furmaziùn «Pierre le chat» cun *Nando Betschart* agl acordeon (el e bagn ancunaschaint a Veulden!) a *Dorival Roshard* ca sùna sen la batareia. Graztga agl urari schlargieu

da la pendiculara e’gl pussevel da turnar a Razén mintga meas’ura antoca las 22.30. Madameing pon ign s’anunztgear pigl survetsch digl bus-taxi ca risguarda igls culiamaints a Tusàn.